

京之時則豈獨嶺外能死人哉目今天變孔慘訛言胥動當此之時 召珙於都下而處危疑逼近之地者適所以速珙之禍使 聖上終始曲全之意反歸虛地矣請加三思亟賜一俞 荅曰國法既已得行大臣不曰不可爾等所謂不顧公議徑情直行之言似乎無據已為議釋豈有還收之理乎亟停勿煩以安予心○憲府啓曰注書黃床以年少輕妄傳會性善陳疏力救如恐不及而臺閣之啓指以為妄論其雄唱雌和表裡相應之跡如見肺肝矣元疏未下雖未知所陳者何說而閭巷之間或有見之者語侵大臣之說人皆傳播況物議方騰而偃然呈單其輕朝廷蔑公議之罪不可不懲請命罷職不叙 荅曰黃床疏中別無語侵大臣之處然難免輕妄之失罷職又啓曰西北邊聲別無緊急而訛言胥動都下洶洶人無固志舉皆荷擔馱載絡繹填咽街巷瞻聆駭異莫知其由安有賊未犯境邊鄙晏然而人心如此之時乎請令漢城府曉諭五部掛榜知會使之鎮定而如有士大夫移出家藏者摘發重究 從之○夜坤方有氣如火光○丁未執義李垓啓曰臣伏見 聖上荅四大將之批大哉王言高出三代天地鬼神實有以諒其誠而禍亂之作無復可慮矣推誠御物化疑梗為訢合實臣之所嘗陳達於 榻前者而中因人心疑懼物議激發不